

Bydymy chnet welować

Nale, co ci to tam jakosik Warszawa. U nos sam we Chorzowie tyż ci sie gorko machluje. Tym istnym, co to ta naszo chorzowsko lynkiyra trzimajom, to sie durch na isto szczuko łod tego co na jejich napolone, rozeżłone ludziska godajom. A sam mocka ci godajom ło roztomajtych chachmyntach, cygaństwach i łonegdysiyjszych łobiyckach samtukej przy każdym, nale to przy każdym welonku.

Nale, kiej my som już przy tym welonku, to we mangli łozprawiała kiejsik staro Piontkowo telki fal. Jedna frela, kiero bedinowała u naszymo Prezidynta, śleciała ze słodow, szczaskała sie cołko rzić i blank ci sie niy poradziła pochytać, przijnść do sia. Uwidzioł to Pon Prezidynt, wartko popruł ku nij, sztreknoł ci jom z delinow i zakludzioł do dom, coby sie legła na zofa.

– Jezderkusie, panoczku – wybronczala ta istno – jak, i cym jo sie mom wom terozki wywdziynczyć?

– A wiedzom łoni paniczko, we październiku bydzie welonek i wy tyż bydziecie łobiyrac nowygo prezidynta. Styknie, iże tyn krzizik docie na mie i bydymy kwita.

– Nale, pon prezidynt przeca same już miarkujom, przeca ujzdrzili gynał, iże jo praskła na rzić a niy na ... **gowa!!!**

No, i to by boło cheba na tela ło welonku.

Ojgyn z Pniokow